

Høyringsbrev revidering av Nissedal kommune sine politivedtekter

Heimel for kommunal politivedtekt følgjer av lov om politiet av 4. august 1995 nr. 53 § 14.

Sidan vedtakinga av den gjeldande normalpolitivedtekta frå 1996, har det skjedd ei rekke lovendingar som har ført til endringar i kva som kan reguleras i politivedtekt. Det har difor vore behov for å utarbeide ei ny normalpolitivedtekt med utgangspunkt i tidlegare utgåve.

Fullmaktsregelen i politiloven § 14 byggjer på prinsippet om at politivedtekter ikkje bør regulere tilhøve:

- som er uttømmende regulert i eller i medhald av anna lov
- som andre styresmakter har overteke det faglege ansvaret for
- som etter si art bør vere politiet uvedkomande
- som ikkje er føremålstenleg eller som er overflødige etter dagens samfunnsforhold og alminnelege toleransegrenser

Som i tidlegare normalpolitivedtekter har ein likevel ikkje vore heilt konsekvent i høve til anna lovgiving. Forbod i andre lover mot ulike former for forsøpling og tilgrising, m.a. i forureiningslova og veglova, er spreidde og primært knytt til konkrete føremål. Her har ein funne at politivedtektene bør kunne innehalde praktisk viktige reglar med sikte på å oppretthalde eit godt lokalmiljø. Politivedtektene bør t.d. kunne forby flaskeknusing og plakatklistring utan at det er naudsynt å gå inn på forholdet til anna lovgjeving. Ein peiker også på at sjølv om t.d. forureiningslova regulerer tilhøve som går inn under ny § 5-1 nr. 1, inneheld den ikkje nokon tilsvarende straffetrussel. Det er viktig at eventuelle forbod vert utforma så presist som mogleg, slik at det ikkje oppstår særleg tvil med omsyn til praktiseringa av forbodet.

Politolova § 14. nr. 6 gjev heimel gjennom kommunal politivedtekt å regulere ervervsverksemd på offentleg stad som ikkje fell inn under regulering i andre lover. Her kan kommunen eksempelvis gi føresegner om fotografer som tilbyr sine tenester til forbipasserande og anna næringsverksemd som ikkje fell inn under anna regelverk.

Nissedal kommune sine politivedtekter er frå 1950, sist revidert i 2010. Gjeldande politivedtekt bygger på tidlegare normalpolitivedtekt.

Nissedal formannskap gjorde i sitt møte den 19.5.2022 i sak 46/22 slikt vedtak:

«Nissedal formannskap legg framlegg til revidert forskrift om politivedtekt for Nissedal kommune ut på Høyring.

Høyringsfristen er 1.6..2022»

Høyringssvar sendast som e-post til info@nissedal.kommune.no

Endringar

Forutan språkleg gjennomgang og oppgradert lovtilvising i kvart kapitel, byggjer den nye normalpolitivedtekta på eit nytt paragrafsystem med kapittelvis nummerering. Dette er gjort for å oppretthalde systematikken i tilfelle der kommunar ynskjer å leggje til eller fjerne føresegner under det enkelte kapittel.

Kapittel VII om dyr og kapittel IX om barn er oppheva og føresegna er redigert eller oppheva.

Kapittel 1. Allmenne føresegner

Kapittelet er vidareført utan vesentlege endringar.

Kapittel 2. Orden på offentleg stad

§ 2-1 inneheld eit nytt andre ledd om nattero og nytt tredje ledd om ro og orden i tilknytning til serveringsstader. Desse føresegna har i dei seinare år blitt stadfesta i fleire kommunale vedtekter og ein standardtekst er difor teke inn i normalpolitivedtekta.

§ 2-2 er ei ny føresegn som gjeld køyring, camping mv. i parkar, på grøntareal og friområde o.l. Føresegna opnar for at kommunar i politivedtekt kan ta inn føresegner som regulerer bruk og parkering av motorkjøretøy og camping, telting mv. i offentlege parkar, grøntareal, friområde o.l. Da dette synast å vere forhold som vil vere aktuelle for fleire kommunar, har direktoratet valt å ta inn ei standardisert formulering.

§ 2-4 er ei ny føresegn som gir høve til å forby eller setje vilkår for tigging. Heimelen for slik regulering blei tatt inn i politiloven § 14 første ledd nr. 8 ved lovendring av 20. juni 2014 nr. 48.

Kapittel 3. Sikring av ferdsla

Kapittelet sine føresegner er omplassert av regeltekniske omsyn. §§ 3-3 og 3-4 er føresegner der politiet kan forby ein bestemt aktivitet, §§ 3-5, 3-6 og 3-7 krev tillating frå eller melding til politiet, medan §§ 3-8 og 3-9 inneheld plikter som kviler på den enkelte eigar eller den ansvarlege.

§ 3-2 om dyr er flytta frå tidligare kapittel VII til kapittel 3, da føresegna må sjåast i lys av sikringsomsyn.

Kapittel 4. Reinhald på offentleg stad

Det er gjort ein regelteknisk endring i kapittelet for å skilje mellom dei ordinære plikter som eigaren er pålagt og dei plikter som berre kan påleggjas eigaren dersom kommunen kan dokumentere at det finst lokal etablert sedvane i nærmare gitt område. Føresegner som krev slik dokumentasjon går nå fram av § 4-4. Elles inneheld ikkje kapittelet nokon realitetsendring.

Kapittel 5. Hindre forsøpling og tilgrising

Kapittelet er vidareført utan vesentlege endringar.

Kapittel 6. Offentlege anlegg

Kapittelet er vidareført utan vesentlege endringar.

Kapittel 7. Arrangement på offentlig stad

§ 7-3 om barns tilgang til offentlig dans er flytta til kapittel 7 frå tidlegare kapittel IX om barn. Elles følgjer ingen realitetsendring av innhaldet.

Kapittel 8. Pantelånarverksemd

Nytt kapittel om pantelånarverksemd er heimla i politiloven § 14 nr. 7. Tilhøvet er ikkje lengre regulert i anna lovgjeving og det synest høveleg å ta inn ei standardisert formulering som tidlegare er stadfesta.

Kapittel 9. Ymse føresegner

§ 9-3 er ei ny føresegn som gir kommunen høve til å handheve paragrafens føresegner i politivedtekt. Kommunens høve til slik handheving er nå heimla i politiloven § 14 tredje ledd ved lovendring av 17. desember 2010 nr. 87.

Føresegner som ikkje er vidareført

Tidlegare § 5 andre ledd om forbod mot å bere ladd skytevåpen på offentlig stad, da tilhøvet i dag vert regulert av straffeloven (2005) § 189.

Tidlegare § 21 tredje ledd, §§ 23 – 25 om tilhøve knytt til hund og hundehald, da tilhøva nå vert regulert i hundeloven av 4. juli 2003 nr. 74. Alle føresegna som er knytt til hundar og hundehald i gjeldande politivedtekter, blei oppheva 31. desember 2006 med heimel i hundeloven § 32. Samtidig blei politiloven § 14 endra slik at det ikkje lengre er høve til å gi føresegner i politivedtekt om hundar og hundehald, jf. § 14 første ledd nr. 1 siste setning. Hundeloven inneheld ein omfattande regulering av hundehald, og lokale føresegner om hundehald kan eventuelt takast inn i lokal vedtekt i medhald av hundeloven, jf. hundeloven § 6 andre ledd bokstav b og § 6 fjerde ledd.